



Publicaziuns dalla vischnaunca, jamna 05

Votaziuns federalas e communalas dils 13 da fevrer 2022

L'urna principala en casa communalas ei aviarta sco suonda:
Dumengia, ils 13-2-2022 9.00–11.00

La documentaziun da votar duess mintga votant/a haver obteniu. Cass cuntrari san ins s'annunziar immediat, denton **sil pli tard entochen venderdis, ils 11 da fevrer 2022, allas 14.00**, tier l'administraziun communalas (tel. 081 920 36 36).

Levgiament da votar

Mintga votant/a ha la pusseivladad da dar giu sia vusch a scret. En gliez mument sto el/ella observar il suandont:

1. Emplenir ora ils cedels da votar a maun e metter quels en la cuviarta da votar grischa e **serrar giu** ella.
2. Metter la cuviarta da votar grischa ensemen cun il certificat dil dretg da votar **suttascret** en la cuviarta alva, cun la quala Vus haveis obteniu la documentaziun da votaziun.
3. La cuviarta ch'ei adressada all'administraziun communalas saveis Vus tarmetter cun posta (supplicau da francar) ni directamein fierer en la scaffa da brevs dalla casa communalas.

Ils cedels da votar ston esser sil pli tard la dumengia, ils 13 da fevrer 2022 allas 11.00 tier l'administraziun communalas.

Aschinavon ch'ei vegn buca risguardau sura instrucziuns da votar, ein ils cedels da votar nunvaleivels.

Suprastonza communalas

Cussegl da vischnaunca

Il luf e l'economisaziun dils rufids occupeschan il cussegl da vischnaunca

Venderdis, ils 28 da schaner 2022 ha giu liug la 10. seduta dil cussegl da vischnaunca dalla perioda d'uffeci 2021/2024. El center dalla seduta ein stadas la tractaziun dalla moziun «Il delinquent luf – Encurir cun la Regenza grischuna ina sliigiaziun» – sco era l'orientaziun e discussiun sur dalla revisiun totala dalla lescha davart l'economisaziun dils rufids.

Il cussegl da vischnaunca sut l'egida da siu president Adrian Deflorin ha igl emprer tractau la moziun «Il delinquent luf», inoltrada ils 19 da november 2021. Suenter la motivaziun dalla moziun entras cusseglier Giusep Lozza han gerau Clemens Berther, il schef digl uffeci da catscha e pesca dil Grischun, dr. med. vet. Adrian Arquint sco era il guardiaselvaschina districtual, Ueli Jörimann, rispundiu detagliadamein la moziun ed explicau las pusseivladads da proteger il carstgaun ed ils animals encunter il luf. Enteifer la discussiun ch'ei suandada ha il cussegl da vischnaunca saviu sclarir culs representants cantunals ulteriuras damondas davart la derasaziun e regulaziun dil luf, ils conflicts denter l'agricultura ed il luf sco era la tema che regia ella populaziun pervia d'inscunters cul luf e co sedepurtar en tals cass. Sin proposta dalla suprastonza communalas ha il cussegl da vischnaunca cun 8 encunter 4 vuschs buc acceptau la moziun «Il delinquent luf».

Silsuenter ha gerau Paul Flurin Schmidt orientau extendidamein il parlament communal sur dalla revisiun totala dalla lescha davart l'economisaziun dils rufids. La cumissiun che ha preparau la revisiun dalla lescha propona d'incassar futuramein la taxa fundamentala per la dismessa dils rufids analog alla taxaziun dalla Regiun Surselva. Quei munta ina midada dil sistem cun pauschalas tenor categorias sin in sistem da fixar la taxa fundamentala sebasond sin la valeta nova dallas immobiglias. Plinavon duein las taxas tenor quantum pils rumians blocconts ni reutilisabels vegnir pagadas entras il caschunader. Il cussegl da vischnaunca ha discussiunau entgins detagls dalla dismessa dallas diversas sorts rumien. A caschun da sia seduta dils 18 da mars 2022 vegn il cussegl da vischnaunca a tractar en detagl la revisiun totala dalla lescha davart l'economisaziun dils rufids.



Informaziun

Informaziuns davart il luf sco era reglas da cumportament ein publicadas sin la pagina d'internet dalla vischnaunca www.disentis.ch sut «Actualitads».

Suprastonza communal

Datas dallas structuradas agricolas, dumbraziun da biestga/animals (Strukturerhebung 2022)

Niev tier la dumbraziun da biestga

Naven digl onn 2022 han ils menaschis buca pli da squitschar ora ils formulars. La dumbraziun da biestga succeda pigl 1. da schaner 2022. Las **registraziuns electronicas** dallas datas ein pusseivlas naven **dils 27 da schaner entochen sil pli tard ils 10 da fevrer 2022**.

Niev pils menaschis da hobi

Per l'emprema gada succeda la dumbraziun dils menaschis da hobi entras la registraziun **electronica** dallas datas. La registraziun via internet succeda naven **dils 17 entochen ils 31 da mars 2022**. Ils menaschis da hobi retscheivan cheutras buca pli ils formulars mellens per la dumbraziun dils animals, ed aschia croda era il termin d'inoltraziun dils documents tier l'administraziun communal.

Tuts menaschis ed elevaturs/possessurs d'animals (era menaschis da hobi) ch'adempleschan las suandontas cundiziuns, ein obligai d'annunziar ils muvels e las surfatschas da terren, independentamein sch'ei vegn retratg contribuziuns ni buca.

a) Surfatschas:

- 1 ha surfatscha utilisabla agricola
- 30 ha cultura speciala
- 10 ha cultivaziun protegida

b) Animals (naven dad in animal):

- armauls (tschaffada TVD), alpacas, cauras, pors, nuorsas, cavals, asens, gaglinam – naven da tschun animals
- aviuls (naven dad in pievel) p.pl. indicar tut ils ualers, era ils vits
- menaschis da tratga da pèschs

Adatg!

Menaschis agricols che vegnan sliyai si ni surdai en auters mauns enteifer igl onn 2022 ein obligai d'annunziar quei gia ussa culs formulars corrispundents.

Per damondas ed informaziuns stat la secretaria dall'administraziun communal Ursina Murer-Fatzer (081 920 36 30 ni umurer@disentis.ch) ni era il gerau cumpetent Clemens Berther (079 619 11 05 ni cultivaziun@disentis.ch) bugen a Vossa disposiziun.

Ulteriuras informaziuns e formulars anfleis Vus sin la pagina d'internet dil Cantun:
www.alg.gr.ch > Dienstleistungen > Landwirtschaft > Strukturerhebung.

Taglia da tgauns 2022

Tenor artechel 7 dalla lescha communal da taglia ei mintga persuna che tegn in tgaun sil territori dalla vischnaunca da Mustér obligada da pagar ina taglia da tgauns. Ulteriur da quei sto il tgaun esser marcaus cun in microchip.

Ils possessurs da tgauns retscheivan directamein in quen per la taglia da tgauns. Quella munta pigl emprem tgaun frs. 120.– e per mintga ulteriur tgaun ella medema casada frs. 180.– per onn. Tgauns da polizia, tgauns da schurmetg, tgauns da lavinas sco era tgauns per tschocs e suords ein deliberai dalla taxa.



Adatg!

Possessurs che acquistan da niev in tgaun ein vinavon obligai da vegnir enteifer 30 dis persunalmein al spurtegl dall'administraziun communalala per cumprovar la registraziun dil microchip. Il conto sin la plattafuorma da datas Amicus vegn endrizzaus entras l'administraziun communalala. Mintga possessur d'in tgaun ei obligaus da registrar acquists, surdadas, mortoris ed exports egl exterior d'in tgaun.

Administraziun communalala

Controlla da habitonts

Mortori

Victoria Pally-Frezza, naschida ils 30 da mars 1939, morta ils 29 da schaner 2022

Clom d'urgenza 118

Preziadas vischinas, preziai vischins

S'imaginei ch'ei brischa e negin vegn! Adina puspei caschunan fiugs gronds donns, gie mettan schizun en prighel la veta da personas – savens perquei ch'ils pumpiers vegnan buca clamai ni memia tard. Biars tratgan: zatgi ha bein alarmau, mo adina puspei ei quei buc il cass, era tier nus el Grischun.

Perquei vala: Tier ina situaziun nua ch'ils pumpiers vegnan duvrai, ei da telefonar immediat al clom d'urgenza 118. Mo aschia eis ei garantiu ch'agid professiunal arriva il pli spert pusseivel sil plaz.

Engraziel per Vies sustegn!

Vos Pumpiers Sursassiala

Entrada anticipada en scoletta

Mintgamai igl uost entran ils affons che han cumplenu il tschunavel onn da vegliadetgna tochen **ils 31 da december** dil medem onn calendar ella scoletta. Tenor la lescha da scola dat ei la pusseivladad d'entrar en scoletta anticipau, quei munta in onn avon.

In'entrada anticipada ella scoletta da Mustér per affons da quater onns ei cumbinada cun claras cundiziuns. Igl affon sto corrispunder en siu entir stadi da svilup alla gruppa d'affons pli veglia ed el sa ir entuorn cun las pretensiuns dalla scoletta senza sustegn special. Davart l'admissiun anticipada decidan duas jamnas da fuffernadi en scoletta. Dapli informaziuns survegnan geniturs interessai tiel meinascola Roger Tuor (081 936 44 25, meinascola@scoladisentis.ch). Annunzias san vegnir inoltradas tochen **ils 11 da mars 2022**. Annunzias suenter quei termin san buca pli vegnir risguardadas.

Cordials salids

Nossa scola populara Mustér

Uniun da dunnas Disentis/Mustér

Scursalada cun viseta da snowli

La gruppa dil ressort affons envida tut ils affons entochen quater onns ensemen cun lur mummas ni era babs e fargliuns ad ina scursalada comunabla sil Sax. Silsuenter vegn offeriu in pign sitg el tipi.

Prendi vossa scarsola ni vies bob sut bratsch e cun empau cletg survegn era vies affon regalau ina pintga sorpresa dil snowli.



Datum: **Gievgia, ils 10 da fevrer 2022**
Sentupada: allas 14.00 sil Sax tier il Tipi
Cuosts: L'occurrenza cuosta
Annunzias: entochen ils 8 da fevrer tier Sarah Huonder, 079 265 42 92 ni Sonja Muscas, 079 681 58 66

Cordialmein envida
Uniun da dunnas, ressort affons

Renunzia dil kino da cudisch da maletgs cun Mats, la miur dils 11 da fevrer 2022 en la Biblioteca populara Disentis/Mustér e contuorn

Muort la situaziun actuala essan nus sedecidi da buca menar atras l'occurrenza da Mats ch'era previda per venderdis, ils 11 da fevrer 2022. Nus sperein sin Vossa capientscha e selegrein puspei sin in'otra ga.

Il team dalla biblioteca cun Mats, la miur

Uniun la pendentia

Informaziun sur dil project «Punt pendentia S. Gada–Mumpé Medel». Nus mussein a Vus la situaziun dalla punt projectada. Tgei avantatgs porta ella per ils avdonts da Mumpé Medel? Tgei valeta ha la punt per la regiun? Co e cu vegn ella realisada?

Orientaziun e discussiun: **Sonda, ils 12 da fevrer 2022**, allas 20.00 en caplutta s. Valentin a Mumpé Medel, (entrada tenor regla 2G cun maschina.).

Cordialmein envida
Uniun la pendentia
